

南無華嚴會上佛菩薩（三稱）

大方廣佛華嚴經卷第四十七

佛不思議法品第三十三之二

「佛子！諸佛世尊有十種廣大佛事，無量無邊，不可思議。一切世間諸天及人，皆不能知，去、來、現在所有一切聲聞、獨覺，亦不能知，唯除如來威神之力。何等為十？所謂：一切諸佛，於盡虛空徧法界，一切世界兜率陀天，皆現受生，修菩薩行，作大佛事。無量色相，無量威德，無量光明，無量音聲，無量言辭，無量三昧，無量智慧所行境界。攝取一切人、天、魔、梵、沙門、婆羅門、阿修羅等。大慈無礙，大悲究竟，平等饒益一切眾生：或令生天，或令生人，或淨其根，或調其心，或時為說差別三乘，或時為說圓滿一乘，普皆濟度，令出生死。是為第一廣大佛事。

佛子！一切諸佛，從兜率天降神母胎，以究竟三昧觀受生法，如幻如化，如影如空，如熱時燄，隨樂而受，無量無礙；入無諍法，起無著智，離欲清淨，成就廣大妙莊嚴藏。受最後身，住大寶莊嚴樓閣，而作佛事：或以神力而作佛事，或以正念而作佛事，或現神通而作佛事，或現智日而作佛事，或現諸佛廣大境界而作佛事，或現諸佛無量光明而作佛事，或入無數廣大三昧而作佛事，或現從彼諸三昧起而作佛事。佛子！如來爾時在母胎中，為欲利益一切世間，種種示現而作佛事。所謂：或現初生，或現童子，或現在宮，或現出家

，或復示現成等正覺，或復示現轉妙法輪，或示現於入般涅槃……，如是皆以種種方便，於一切方、一切網、一切旋、一切種、一切世界中而作佛事。是為第二廣大佛事。

佛子！一切諸佛，一切善業，皆已清淨；一切生智，皆已明潔，而以生法誘導群迷，令其開悟，具行眾善。為眾生故，示誕王宮，一切諸佛，於諸色欲、宮殿、妓樂，皆已捨離，無所貪染；常觀諸有，空無體性，一切樂具，悉不真實，持佛淨戒，究竟圓滿。觀諸內宮妻妾、侍從，生大悲愍；觀諸眾生，虛妄不實，起大慈心；觀諸世間，無一可樂，而生大喜；於一切法，心得自在，而起大捨。具佛功德，現生法界，身相圓滿，眷屬清淨，而於一切，皆無所著；以隨類音，為眾演說，令於世法，深生厭離，如其所行，示所得果。復以方便，隨應教化，未成熟者，令其成熟；已成熟者，令得解脫，為作佛事，令不退轉。復以廣大慈悲之心，恆為眾生說種種法；又為示現三種自在，令其開悟，心得清淨。雖處內宮，眾所咸觀，而於一切諸世界中，施作佛事，以大智慧，以大精進，示現種種諸佛神通，無礙無盡。恆住三種巧方便業，所謂：身業究竟清淨、語業常隨智慧而行、意業甚深無有障礙，以是方便，利益眾生。是為第三廣大佛事。

佛子！一切諸佛，示處種種莊嚴宮殿，觀察厭離，捨而出家，欲使眾生，了知世法皆是妄想、無常、敗壞，深起厭離，

不生染著，永斷世間貪愛煩惱，修清淨行，利益眾生。當出家時，捨俗威儀，住無諍法，滿足本願無量功德，以大智光，滅世癡闇，為諸世間無上福田。常為眾生讚佛功德，令於佛所植諸善本，以智慧眼，見真實義；復為眾生，讚說出家清淨無過，永得出離，長為世間智慧高幢。是為第四廣大佛事。

佛子！一切諸佛，具一切智，於無量法，悉已知見。菩提樹下，成最正覺，降伏眾魔，威德特尊。其身充滿一切世界，神力所作，無邊無盡，於一切智所行之義，皆得自在，修諸功德，悉已圓滿。其菩提座，具足莊嚴，周徧十方一切世界，佛處其上，轉妙法輪，說諸菩薩所有行願，開示無量諸佛境界，令諸菩薩皆得悟入，修行種種清淨妙行。復能示導一切眾生，令種善根，生於如來平等地中，住諸菩薩無邊妙行，成就一切功德勝法；一切世界、一切眾生、一切佛剎、一切諸法、一切菩薩、一切教化、一切三世、一切調伏、一切神變、一切眾生心之樂欲，悉善了知而作佛事。是為第五廣大佛事。

佛子！一切諸佛，轉不退法輪，令諸菩薩不退轉故；轉無量法輪，令一切世間咸了知故；轉開悟一切法輪，能大無畏師子吼故；轉一切法智藏法輪，開法藏門，除闇障故；轉無礙法輪，等虛空故；轉無著法輪，觀一切法非有無故；轉照世

法輪，令一切眾生，淨法眼故；轉開示一切智法輪，悉徧一切三世法故；轉一切佛同一法輪，一切佛法不相違故。一切諸佛，以如是等無量無數，百千億那由他法輪，隨諸眾生心行差別而作佛事，不可思議。是為第六廣大佛事。

佛子！一切諸佛，入於一切王都城邑，為諸眾生而作佛事。所謂：人王都邑、天王都邑，龍王、夜叉王、乾闥婆王、阿修羅王、迦樓羅王、緊那羅王、摩睺羅伽王、羅剎王、毘舍闍王……，如是等王一切都邑。入城門時，大地震動，光明普照，盲者得眼，聾者得耳，狂者得心，裸者得衣，諸憂苦者，悉得安樂。一切樂器，不鼓自鳴，諸莊嚴具，若著不著，咸出妙音，眾生聞者，無不欣樂。一切諸佛，色身清淨，相好具足，見者無厭，能為眾生作於佛事。所謂：若顧視，若觀察，若動轉，若屈伸，若行若住，若坐若臥，若默若語，若現神通，若為說法，若有教敕……，如是一切，皆為眾生而作佛事。一切諸佛，普於一切無數世界，種種眾生心樂海中，勸令念佛，常勤觀察，種諸善根，修菩薩行；歎佛色相微妙第一，一切眾生難可值遇，若有得見而興信心，則生一切無量善法，集佛功德，普皆清淨。如是稱讚佛功德已，分身普往十方世界，令諸眾生，悉得瞻奉，思惟觀察，承事供養，種諸善根，得佛歡喜，增長佛種，悉當成佛。以如是行而作佛事。或為眾生示現色身，或出妙音，或但微笑，令其信樂，頭頂禮敬，曲躬合掌，稱揚讚歎，問訊起居，而作

佛事。一切諸佛以如是等，無量無數不可言說、不可思議種種佛事，於一切世界中，隨諸眾生心之所樂，以本願力、大慈悲力、一切智力，方便教化，悉令調伏。是為第七廣大佛事。

佛子！一切諸佛，或住阿蘭若處而作佛事；或住寂靜處而作佛事；或住空閑處而作佛事；或住佛住處而作佛事；或住三昧而作佛事；或獨處園林而作佛事；或隱身不現而作佛事；或住甚深智而作佛事；或住諸佛，無比境界而作佛事；或住不可見種種身行，隨諸眾生心樂欲解，方便教化無有休息，而作佛事；或以天身，求一切智而作佛事；或以龍身、夜叉身、乾闥婆身、阿修羅身、迦樓羅身、緊那羅身、摩睺羅伽、人非人等身，求一切智而作佛事；或以聲聞身、獨覺身、菩薩身，求一切智而作佛事。或時說法，或時寂默而作佛事；或說一佛，或說多佛而作佛事；或說諸菩薩一切行、一切願，為一行願而作佛事；或說諸菩薩一行一願，為無量行願而作佛事；或說佛境界，即世間境界而作佛事；或說世間境界，即佛境界而作佛事；或說佛境界，即非境界而作佛事。或住一日，或住一夜，或住半月，或住一月，或住一年，乃至住不可說劫，為諸眾生而作佛事。是為第八廣大佛事。

佛子！一切諸佛，是生清淨善根之藏。令諸眾生，於佛法中生淨信解，諸根調伏，永離世間；令諸菩薩於菩提道，具智

慧明，不由他悟。或現涅槃而作佛事；或現世間皆悉無常而作佛事；或說佛身而作佛事；或說所作皆悉已辦而作佛事；或說功德圓滿無缺而作佛事；或說永斷諸有根本而作佛事；或令眾生厭離世間，隨順佛心而作佛事；或說壽命，終歸於盡而作佛事；或說世間，無一可樂而作佛事；或為宣說盡未來際，供養諸佛而作佛事；或說諸佛轉淨法輪，令其得聞生大歡喜而作佛事；或為宣說諸佛境界，令其發心而修諸行而作佛事；或為宣說念佛三昧，令其發心，常樂見佛而作佛事；或為宣說諸根清淨，勤求佛道，心無懈怠而作佛事；或詣一切諸佛國土，觀諸境界，種種因緣而作佛事；或攝一切諸眾生身，皆為佛身，令諸懈怠放逸眾生，悉住如來清淨禁戒而作佛事。是為第九廣大佛事。

佛子！一切諸佛入涅槃時，無量眾生悲號涕泣，生大憂惱，遞相瞻顧而作是言：『如來世尊，有大慈悲，哀愍饒益一切世間，與諸眾生為救為歸。如來出現，難可值遇，無上福田，於今永滅。』即以如是，令諸眾生悲號戀慕，而作佛事。復為化度一切天、人、龍神、夜叉、乾闥婆、阿修羅、迦樓羅、緊那羅、摩睺羅伽、人非人等故，隨其樂欲，自碎其身以為舍利，無量無數不可思議。令諸眾生，起淨信心，恭敬尊重，歡喜供養，修諸功德，具足圓滿。復起於塔，種種嚴飾，於諸天宮、龍宮、夜叉宮，乾闥婆、阿修羅、迦樓羅、緊那羅、摩睺羅伽、人非人等諸宮殿中，以為供養。牙齒爪髮

，咸以起塔，令其見者，皆悉念佛、念法、念僧，信樂不迴，誠敬尊重，在在處處，布施供養，修諸功德。以是福故，或生天上，或處人間，種族尊榮，財產備足，所有眷屬，悉皆清淨，不入惡趣。常生善道，恆得見佛，具眾白法；於三有中，速得出離，各隨所願，獲自乘果。於如來所，知恩報恩，永與世間作所歸依。佛子！諸佛世尊雖般涅槃，仍與眾生作不思議清淨福田、無盡功德最上福田，令諸眾生善根具足、福德圓滿。是為第十廣大佛事。

佛子！此諸佛事，無量廣大不可思議，一切世間諸天及人，及去、來、今聲聞、獨覺，皆不能知，唯除如來威神所加。

佛子！諸佛世尊有十種，無二行自在法。何等為十？所謂：一切諸佛，悉能善說授記言辭，決定無二；一切諸佛，悉能隨順眾生心念，令其意滿，決定無二；一切諸佛，悉能現覺一切諸法，演說其義，決定無二；一切諸佛，悉能具足去、來、今世諸佛智慧，決定無二；一切諸佛，悉知三世一切剎那，即一剎那，決定無二；一切諸佛，悉知三世一切佛剎，入一佛剎，決定無二；一切諸佛，悉知三世一切佛語，即一佛語，決定無二；一切諸佛，悉知三世一切諸佛，與其所化一切眾生，體性平等，決定無二；一切諸佛，悉知世法及諸佛法性無差別，決定無二；一切諸佛，悉知三世一切諸佛，所有善根同一善根，決定無二。是為十。

佛子！諸佛世尊有十種住，住一切法。何等為十？所謂：一切諸佛住覺悟一切法界，一切諸佛住大悲語，一切諸佛住本大願，一切諸佛住不捨調伏眾生，一切諸佛住無自性法，一切諸佛住平等利益，一切諸佛住無忘失法，一切諸佛住無障礙心，一切諸佛住恆正定心，一切諸佛住等入一切法不違實際相。是為十。

佛子！諸佛世尊有十種，知一切法盡無有餘。何等為十？所謂：知過去一切法，盡無有餘；知未來一切法，盡無有餘；知現在一切法，盡無有餘；知一切言語法，盡無有餘；知一切世間道，盡無有餘；知一切眾生心，盡無有餘；知一切菩薩善根上、中、下種種分位，盡無有餘；知一切佛圓滿智，及諸善根不增不減，盡無有餘；知一切法皆從緣起，盡無有餘；知一切世界種，盡無有餘；知一切法界中，如因陀羅網諸差別事，盡無有餘。是為十。

佛子！諸佛世尊有十種力。何等為十？所謂：廣大力、最上力、無量力、大威德力、難獲力、不退力、堅固力、不可壞力、一切世間不思議力、一切眾生無能動力。是為十。

佛子！諸佛世尊有十種，大那羅延幢勇健法。何者為十？所謂：一切諸佛身不可壞，命不可斷，世間毒藥所不能中，一

切世界水、火、風災，皆於佛身不能為害。一切諸魔、天、龍、夜叉、乾闥婆、阿修羅、迦樓羅、緊那羅、摩睺羅伽、人非人、毘舍闍、羅刹等，盡其勢力，雨大金剛，如須彌山及鐵圍山，徧於三千大千世界，一時俱下，不能令佛心有驚怖，乃至一毛，亦不搖動，行住坐臥，初無變易。佛所住處，四方遠近，不令其下，則不能雨；假使不制而從雨之，終不為損。若有眾生為佛所持，及佛所使，尚不可害，況如來身？是為諸佛第一大那羅延幢勇健法。

佛子！一切諸佛以一切法界，諸世界中須彌山王，及鐵圍山、大鐵圍山、大海、山林、宮殿、屋宅，置一毛孔，盡未來劫，而諸眾生不覺不知，唯除如來神力所被。佛子！爾時諸佛於一毛孔，持於爾所一切世界，盡未來劫，或行或住，或坐或臥，不生一念勞倦之心。佛子！譬如虛空，普持一切徧法界中所有世界，而無勞倦；一切諸佛於一毛孔，持諸世界，亦復如是。是為諸佛第二大那羅延幢勇健法。

佛子！一切諸佛能於一念，起不可說不可說，世界微塵數步，一一步過不可說不可說，佛剎微塵數國土，如是而行，經一切世界微塵數劫。佛子！假使有一大金剛山，與上所經一切佛剎，其量正等，如是量等大金剛山，有不可說不可說佛剎微塵數諸佛，能以如是諸山，置一毛孔。佛身毛孔與法界中，一切眾生毛孔數等，一一毛孔，悉置爾許大金剛山，持

爾許山，遊行十方，入盡虛空一切世界。從於前際，盡未來際一切諸劫，無有休息，佛身無損，亦不勞倦，心常在定，無有散亂。是為諸佛第三大那羅延幢勇健法。

佛子！一切諸佛一坐食已，結跏趺坐，經前後際不可說劫，入佛所受不思議樂，其身安住，寂然不動，亦不廢捨化眾生事。佛子！假使有人於徧虛空一一世界，悉以毛端次第度量，諸佛能於一毛端處，結跏趺坐，盡未來劫；如一毛端處，一切毛端處，悉亦如是。佛子！假使十方一切世界所有眾生，一一眾生，其身大小，悉與不可說佛剎微塵數世界量等，輕重亦爾。諸佛能以爾所眾生，置一指端，盡於後際所有諸劫；一切指端，皆亦如是，盡持爾許一切眾生，入徧虛空一一世界，盡於法界，悉使無餘，而佛身心曾無勞倦。是為諸佛第四大那羅延幢勇健法。

佛子！一切諸佛能於一身，化現不可說不可說，佛剎微塵數頭；一一頭，化現不可說不可說佛剎微塵數舌；一一舌，化出不可說不可說，佛剎微塵數差別音聲，法界眾生靡不皆聞；一一音聲，演不可說不可說，佛剎微塵數修多羅藏；一一修多羅藏，演不可說不可說佛剎微塵數法；一一法，有不可說不可說佛剎微塵數，文字句義。如是演說，盡不可說不可說佛剎微塵數劫；盡是劫已，復更演說，盡不可說不可說佛剎微塵數劫；如是次第，乃至盡於一切世界微塵數，盡一切

眾生心念數。未來際劫，猶可窮盡；如來化身，所轉法輪，無有窮盡。所謂：智慧演說法輪、斷諸疑惑法輪、照一切法法輪、開無礙藏法輪、令無量眾生歡喜調伏法輪、開示一切諸菩薩行法輪、高升圓滿大智慧日法輪、普然照世智慧明燈法輪、辯才無畏種種莊嚴法輪。如一佛身，以神通力，轉如是等差別法輪，一切世法無能為喻。如是盡虛空界，一一毛端分量之處，有不可說不可說佛剎微塵數世界；一一世界中，念念現不可說不可說，佛剎微塵數化身；一一化身，皆亦如是。所說音聲文字句義，一一充滿一切法界，其中眾生皆得解了，而佛言音無變無斷、無有窮盡。是為諸佛第五大那羅延幢勇健法。

佛子！一切諸佛皆以德相，莊嚴胸臆，猶若金剛，不可損壞。菩提樹下，結跏趺坐，魔王軍眾，其數無邊，種種異形，甚可怖畏，眾生見者，靡不驚懼，悉發狂亂，或時致死。如是魔眾，徧滿虛空，如來見之，心無恐怖，容色不變，一毛不豎，不動不亂；無所分別，離諸喜怒，寂然清淨，住佛所住。具慈悲力，諸根調伏，心無所畏，非諸魔眾所能傾動，而能摧伏一切魔軍，皆使迴心，稽首歸依；然後復以三輪教化，令其悉發阿耨多羅三藐三菩提意，永不退轉。是為諸佛第六大那羅延幢勇健法。

佛子！一切諸佛有無礙音，其音普徧十方世界，眾生聞者，

自然調伏。彼諸如來所出音聲，須彌盧等一切諸山，不能為障；天宮、龍宮、夜叉宮，乾闥婆、阿修羅、迦樓羅、緊那羅、摩睺羅伽、人非人等一切諸宮，所不能障；一切世界高大音聲，亦不能障。隨所應化，一切眾生靡不皆聞，文字句義，悉得解了。是為諸佛第七大那羅延幢勇健法。

佛子！一切諸佛心無障礙，於百千億那由他不可說不可說劫，恆善清淨，去來現在一切諸佛，同一體性，無濁無翳，無我無我所，非內非外，了境空寂，不生妄想。無所依，無所作，不住諸相，永斷分別。本性清淨，捨離一切攀緣憶念，於一切法，常無違諍；住於實際，離欲清淨，入真法界，演說無盡。離量、非量所有妄想，絕為、無為一切言說。於不可說無邊境界，悉已通達，無礙無盡，智慧方便，成就十力，一切功德，莊嚴清淨，演說種種無量諸法，皆與實相，不相違背；於諸法界，三世諸法，悉等無異，究竟自在，入一切法最勝之藏。一切法門正念不惑，安住十方一切佛剎而無動轉。得不斷智，知一切法究竟無餘，盡諸有漏。心善解脫，慧善解脫，住於實際，通達無礙。心常正定，於三世法，及以一切眾生心行，一念了達，皆無障礙。是為諸佛第八大那羅延幢勇健法。

佛子！一切諸佛同一法身，境界無量身、功德無邊身、世間無盡身、三界不染身、隨念示現身、非實非虛平等清淨身、

無來無去無為不壞身、一相無相法自性身、無處無方徧一切身、神變自在無邊色相身、種種示現普入一切身、妙法方便身、智藏普照身、示法平等身、普徧法界身、無動無分別非有非無常清淨身、非方便非不方便非滅非不滅隨所應化一切眾生種種信解而示現身、從一切功德寶所生身、具一切諸佛法真如身、本性寂靜無障礙身、成就一切無礙法身、徧住一切清淨法界身、分形普徧一切世間身、無攀緣無退轉永解脫具一切智普了達身。是為諸佛第九大那羅延幢勇健法。

佛子！一切諸佛，等悟一切諸如來法，等修一切諸菩薩行，若願、若智清淨平等，猶如大海，悉得滿足。行力尊勝，未曾退怯，住諸三昧無量境界，示一切道，勸善誡惡。智力第一，演法無畏，隨有所問，悉能善答。智慧說法，平等清淨，身、語、意行，悉皆無雜。住佛所住諸佛種性，以佛智慧而作佛事。住一切智，演無量法，無有根本，無有邊際，神通智慧不可思議，一切世間無能解了。智慧深入，見一切法，微妙廣大，無量無邊，三世法門，咸善通達，一切世界，悉能開曉。以出世智，於諸世間，作不可說種種佛事，成不退智，入諸佛數。雖已證得，不可言說離文字法，而能開示種種言辭，以普賢智，集諸善行，成就一念相應妙慧，於一切法，悉能覺了。如先所念一切眾生，皆依自乘而施其法；一切諸法、一切世界、一切眾生、一切三世，於法界內，如是境界，其量無邊，以無礙智，悉能知見。佛子！一切諸佛

，於一念頃，隨所應化，出興於世，住清淨土，成等正覺，現神通力，開悟三世一切眾生心意及識，不失於時。佛子！眾生無邊，世界無邊，法界無邊，三世無邊，諸佛最勝，亦無有邊，悉現於中，成等正覺，以佛智慧，方便開悟，無有休息。佛子！一切諸佛以神通力，現最妙身，住無邊處，大悲方便，心無障礙，於一切時，常為眾生演說妙法。是為諸佛第十大那羅延幢勇健法。

佛子！此一切諸佛，大那羅延幢勇健法，無量無邊、不可思議，去、來、現在一切眾生及以二乘，不能解了，唯除如來神力所加。

佛子！諸佛世尊有十種決定法。何等為十？所謂：一切諸佛，定從兜率，壽盡下生；一切諸佛，定示受生處胎十月；一切諸佛，定厭世俗，樂求出家；一切諸佛，決定坐於菩提樹下，成等正覺，悟諸佛法；一切諸佛，定於一念，悟一切法，一切世界示現神力；一切諸佛，定能應時轉妙法輪；一切諸佛，定能隨彼所種善根，應時說法而為授記；一切諸佛，定能應時為作佛事；一切諸佛，定能為諸成就菩薩而授記；一切諸佛，定能一念，普答一切眾生所問。是為十。

佛子！諸佛世尊有十種速疾法。何等為十？所謂：一切諸佛若有見者，速得遠離一切惡趣。一切諸佛若有見者，速得圓

滿殊勝功德。一切諸佛若有見者，速能成就廣大善根。一切諸佛若有見者，速得往生淨妙天上。一切諸佛若有見者，速能除斷一切疑惑。一切諸佛，若已發菩提心而得見者，速得成就廣大信解，永不退轉；能隨所應，教化眾生，若未發心，即能速發阿耨多羅三藐三菩提心。一切諸佛，若未入正位而得見者，速入正位。一切諸佛若有見者，速能清淨世、出世間一切諸根。一切諸佛若有見者，速得除滅一切障礙。一切諸佛若有見者，速能獲得無畏辯才。是為十。

佛子！諸佛世尊有十種，應常憶念清淨法。何等為十？所謂：一切諸佛過去因緣，一切菩薩應常憶念；一切諸佛清淨勝行，一切菩薩應常憶念；一切諸佛滿足諸度，一切菩薩應常憶念；一切諸佛成就大願，一切菩薩應常憶念；一切諸佛積集善根，一切菩薩應常憶念；一切諸佛已具梵行，一切菩薩應常憶念；一切諸佛現成正覺，一切菩薩應常憶念；一切諸佛色身無量，一切菩薩應常憶念；一切諸佛神通無量，一切菩薩應常憶念；一切諸佛十力無畏，一切菩薩應常憶念。是為十。

佛子！諸佛世尊有十種一切智住。何等為十？所謂：一切諸佛於一念中，悉知三世一切眾生心、心所行。一切諸佛於一念中，悉知三世一切眾生，所集諸業及業果報。一切諸佛於一念中，悉知一切眾生所宜，以三種輪教化調伏。一切諸佛

於一念中，盡知法界一切眾生，所有心相，於一切處普現佛興，令其得見，方便攝受。一切諸佛於一念中，普隨法界一切眾生心樂欲解，示現說法，令其調伏。一切諸佛於一念中，悉知法界，一切眾生心之所樂，為現神力。一切諸佛於一念中，徧一切處，隨所應化一切眾生，示現出興，為說佛身不可取著。一切諸佛於一念中，普至法界一切處、一切眾生彼彼諸道。一切諸佛於一念中，隨諸眾生有憶念者，在在處處，無不往應。一切諸佛於一念中，悉知一切眾生解、欲，為其示現無量色相。是為十。

佛子！諸佛世尊有十種，無量不可思議佛三昧。何等為十？所謂：一切諸佛，恆在正定，於一念中，徧一切處，普為眾生廣說妙法。一切諸佛，恆在正定，於一念中，徧一切處，普為眾生說無我際。一切諸佛，恆住正定，於一念中，徧一切處，普入三世。一切諸佛，恆在正定，於一念中，徧一切處，普入十方廣大佛剎。一切諸佛，恆在正定，於一念中，徧一切處，普現無量種種佛身。一切諸佛，恆在正定，於一念中，徧一切處，隨諸眾生種種心解，現身、語、意。一切諸佛，恆在正定，於一念中，徧一切處，說一切法離欲真際。一切諸佛，恆住正定，於一念中，徧一切處，演說一切緣起自性。一切諸佛，恆住正定，於一念中，徧一切處，示現無量世、出世間廣大莊嚴，令諸眾生常得見佛。一切諸佛，恆住正定，於一念中，徧一切處，令諸眾生悉得通達一切佛

法，無量解脫，究竟到於無上彼岸。是為十。

佛子！諸佛世尊有十種無礙解脫。何等為十？所謂：一切諸佛，能於一塵，現不可說不可說，諸佛出興於世；一切諸佛，能於一塵，現不可說不可說，諸佛轉淨法輪；一切諸佛，能於一塵，現不可說不可說，眾生受化調伏；一切諸佛，能於一塵，現不可說不可說諸佛國土；一切諸佛，能於一塵，現不可說不可說菩薩授記；一切諸佛，能於一塵，現去、來、今一切諸佛；一切諸佛，能於一塵，現去、來、今諸世界種；一切諸佛，能於一塵，現去、來、今一切神通；一切諸佛，能於一塵，現去、來、今一切眾生；一切諸佛，能於一塵，現去、來、今一切佛事。是為十。」

大方廣佛華嚴經卷第四十七

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無三滿哆 沒馱喃 阿鉢囉帝 賀多折 折捺彌
唵 雞彌雞彌 怛塔葛塔喃 末瓦山矽鉢囉帝
烏怛摩怛摩 怛塔葛塔喃 末瓦吽發莎訶（三遍）

普光再會 大法重宣 高超十聖與三賢
等覺義幽玄 心月孤圓 究竟離言詮

華嚴字母 眾藝親宣 善財童子得真傳
祕密義幽玄 功德無邊 唱誦利人天

也○陽蠅容余遙 唯移寅延淫鹽由也
唱也字時 普願法界眾生 入般若波羅密門

瑟◎尸尸書書尸 師尸尸師尸師師瑟
吒○張徵中朱朝 裡知珍徂砧詒轉吒
唱瑟吒字時 普願法界眾生 入般若波羅密門

迦○岡拒公孤高 該雞斤干金甘鈎迦
唱迦字時 普願法界眾生 入般若波羅密門

四十二字妙陀羅 字字包含義理多 也瑟吒迦
梵韻滿娑婆 功德大 法界沐恩波

四生九有 同歸淨土法門
三世眾生 共入彌陀願海
十方菩薩 逕往蓮邦佛國
南無華嚴海會佛菩薩 (三唱)

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國